

悅
親
樓
詩
集

將有感於身之所遭時事之所閱歷上之可以持君臣
父子之經下之亦可以達匹夫匹婦難言之隱若柴桑
曲江少陵之流大節孤忠慷慨奮發於千載之上而後
之讀其詩者尙可想見當時治亂興衰與其感激湮鬱
不得已之意蓋詩之不可廢也如此余同年友止堂前
輩以詩學稱於京師自翰林諸公以逮求名取科之士
皆持所爲詩就正是非甲乙直道不苟其於百氏之書
靡不誦習討論而皆用以資爲詩其平生出處之節身
世交際聚散升沈之故有動於中則皆以詩寫其情而
不悖於義其辭雄古淵博蒼莽變化如神龍在天烟雨
迷離蜿蜒而不可測及冥心孤往別開幽徑則又令人

悅親樓集 施序

掩卷而思執筆而歎爲不能至余嘗論近時浙人之詩商寶意法揜其才袁簡齋才軼於法若杭堇浦則所謂川人之爲庖求如浙中庖者之妙了不可得止堂有過人之才御之以唐人之法而又以自枉流行之真氣出入捺縱乎其中當於朱錫鬯查悔餘二公之後卓然爲浙中詩家一大宗必傳於後無疑也烏虜止堂以弱冠登上第爲

天子儒臣玉堂後進門牆林立何其盛也且如止堂質性堅定果於任事謂可坐致合鼎遂巡二十餘年乃猶以編修改御史越二年而以彈事不合鐫級遂挂冠歸又何其勇於退也雖然詩人鮮爲大官蓋自古所同而

止堂當太平無事之世身退而詩益工名益可貴重自
此扁舟南下放浪西湖孤山之間臨風高詠雲霞水木
照耀几席方與二三古人往來揖讓回首北望長安門
外車轂殷雷嚴寒酷暑奔走不息未幾而身名俱盡者
果何爲哉果何爲哉

乾隆五十有五年秋七月戊申年眷侍生施朝翰謹序

止堂先生學通五際才備九能翬翬之思內修乎穆行
熊熊之采外溢乎縉繩故能敷吻成瀾含笑奏理餐花
一樹映腸胃而生明唾地三篇和金石而流響驚才風
逸絕調煙高不挫質於鼎鐘不損華於林澍交夏鸛鷺
之韻雜寫魚鳥之歡斯誠藝苑之鴻裁詩人之通矩也
然而丹以九還而見寶劍因萬灌而稱神追史筆於龍
門遊而益肆論文章於庾信老去夏成而先生以終賈
之年耀機雲之秀蜚聲蓬苑揆藻木天燭撤金蓮照合
歡之席筆分丹露賦催妝之詩當是時子晉神仙微之
才子錦筵橫孽麝墨紛飛擢初日之芙蓉奏晚風之楊
柳長離纒耀而百鳥早效其羽毛清角一鳴而羣工自

駭其聲響已雖然燕臺踈陵馬盡如龍日下遨遊士誰
非鶴當夫雲霞結契金絲引和冰盞晨敲而題闕消夏
檀簾夕設而會約圍鑪或流連於一味之甘或鄭重於
孤花之賞燭已殘而油鐙繼香未盡而銅鉢催四座傳
看一篇跳出子雲稱長卿賦非人閒來景文羨太沖詩
有世表意固負聲之力健亦翕羽之助兼焉及乎躬持
莖蕩遠降輪軒使者星明周官典重靜按魚龍之陣廣
噓桃李之風則自西歷劍門南經閩嶠振衣太華之頂
弭節清渭之濱目拭銀河攬莖靈於海嶽手搯金簡證
形勢於廣輪必使草木盡入其藥籠風雲亦歸其鑪鞴
事往思古情來切今氣象得其萬千胸次吞乎八九今

夫陽藎陰敷者廕德之量也道華愚始者損兌之符也以先生出持玉尺入履金門筆珥螭坳冠豸豸角豈不沛沛乎極遭際之榮哉而乃文星小謫晝景猶熙片珎頽遲雙輪駕速鬱青霞之奇想作紫塞之遐征振筆於木葉之山浣紙於松花之水吟成霹靂石虎羣驚彈入琵琶天鷲亂落尉遲杯滿賭塞酒其何辭敕勒歌高譜邊聲而自壯月幕命金笳而唱霜鞭敲銅鐙而吟先生之興豪矣先生之懷曠矣旣而淵明歸去田園已蕪高士清談樵蘇不爨訪秋色於蓴鱸風裏弄清流於鰕菜船邊雖茅屋稻花茫茫此願而小山桂子往往畱賓借光什以引伸因素波而斟酌著謝家之屐山水方滋攜

叔夜之琴煙霞獨浪用以發皇耳目澡雪性靈花窠蜜
而愈甘絲絡冰而更潔此其所以屢變益上而仰止末
由也與論者謂先生擅雞碑之哲逞龍文之姿奇穎發
翹強臺直上亦何難早搴槐采自致旒窩從卷阿以遊
聯柏梁之句而乃脫朝簪於中歲遂初服於海隅得毋
有乾暎之鬱憂江州之感慨焉不知一場富貴無非春
夢之婆半日蕭閒難得秋聲之館何愁甌破自妙刀藏
賀老清吟半在乞湖以後羲之逸興彌增誓墓之餘非
天之厚以林泉實天之振其風雅也麒以子夏之門人
侍暮春之末坐舊傳師鉢同此莊荒能陟祖庭不爲綠
淺何意藏山之巨製居然授簡於鰈生將搔首而問天

早搶頭而帖地刺船已去彌思海上之琴聽竹而來竊
媿柯亭之笛擬彥升之弁文憲願以酬恩幸李漢之附
昌黎因之傳久他日詞垣再

召朝匠重徵位進三旌集成一品序之者當更有鴻筆
在麒又烏能測其盛哉門人吳錫麒謹序

悅親樓詩集總目

卷一

詩七十二首

卷二

詩七十八首

卷三

詩六十六首

卷四

詩一百四首

卷五

詩七十九首

卷六

詩八十二首

卷七

詩七十六首

卷八

詩九十六首

卷九

詩一百十九首

卷十

詩七十八首

卷十一

詩五十九首

卷十二

詩五十六首

卷十三

詩五十六首

卷十四

詩七十首

卷十五

詩七十三首

卷十六

詩五十八首

卷十七

詩八十三首

卷十八

詩五十九首

卷十九

詩七十五首

卷二十

詩一百一首

卷廿一

詩六十首

卷廿二

詩六十五首

卷廿三

詩五十九首

卷廿四

詩七十八首

卷廿五

詩九十五首

卷廿六

詩四十九首

卷廿七

詩七十二首

卷廿八

詩九十二首

卷廿九

詩九十一首

卷三十

詩九十一首

悅親樓詩集總目終

姑蘇張遇清局刻

悅親樓詩集卷一

起庚辰訖癸未正月

海寧祝德麟止堂

古今體詩七十二首

古詩九首

刪書斷唐虞功德何蕩蕩天地乍平成帝王相禪讓雍
容三代祖廟拜一堂上君臣交咨做庶采共寅亮後惟
闕里庭諸賢侍素王依春秋傳注讀知爾則何以盍自言志量
兵農禮樂職亦各有所當規模稍陜隘氣象猶可傷寥
寥四千年運會歷衰旺雖當極治朝孰敢相輩行今逢
聖神主上理勲華抗人人可臯夔許身其或儻

廟堂重制作文質相昭明聞樂知德備觀禮識政成帝

王不相襲美善各自呈要其聲容盛實本蘊蓄宏聖人
詔爲邦輅冕竝時行蓋由顏氏子庶幾三代英用行而
舍藏已得禮樂情數端特舉示以爲法守程不然一車
服遂足致治平彼莽造新室事事皆紛夏文必仿二典
官必設六卿胡爲適召亂徒成愚妄名

今日鏤一花明日雕一葉天工設如此萬彙何由及大
塊著文章化機所鼓捷春風一披拂生意徧周浹人從
團土初如穀始種粒此後漸蕃衍耕稼不待習父子遞
嬗代夫婦各配合聽其芸芸生與天已無涉惟此惠逆
理在人自出入天如大圓鏡妍醜影畢納窮通與壽夭
分別作報答亦憑一理推無事逐物給

人毛以鬢，地毛以草，樹自生還自長，名類不知數。一朝移缶，盜供人戲玩，具灌溉或失時，枝葉頓萎，仆其在大地者，非不仰雨露，偶逢旱乾，年生機亦如故。乃知后土德豐澤，無耗斲，九淵涵脈，絡似血，周身注根，株所屈蟠，潤氣早布，濩秦松與漢柏，星霜幾千度，柰何局小器。一撮但旅寓，欲求敷條榮，先在植根固。

士懷幹濟，略孰不思用世，同此進取心，時有利不利，時來則龍見沛然，莫能制，雖經棧閣險坦，如履平地，當其蠖屈初潛，光守顛，賴舟行遇石，尤尺寸亦難濟。小白得夷吾，遂以齊國寄飛鴻，未羽翼三仕三放，棄季子十上書，金盡貂裘，傲一朝佩相印，六國盡連綴，管蘇固羞稱。

孔孟亦何異天命有定端君子但居易

經綸蘊雷雨上德次以功功必因人建事會寧易逢呂
望困磻谿西伯兆彫熊倘非後車載誰識屠釣翁伊尹
五就桀夏日方昏蒙苟無三聘至莘野一老農唯德可
特立言亦由我衷聖賢敷經訓日月光天中後儒互闡
發教澤垂無窮要以文載道不取詞說空士生百世下
蜩蟬嘶秋風雕蟲非壯夫吾聞諸揚雄

東班接西馬漢書實史祖孟堅等穿窬嗤之夾深序父
羲而子獻千秋擅豪楮子敬同面牆誚之過庭譜前徽
固難掩後美克纘緒輕薄哂未休視今猶視古鄭志二
十略十五自誇詡丹元步天歌胡爲全襲取孫書工轉

用學者得規矩專草則遺真亦未跨虞褚論人誠不難
自審當何處吾曹慎譏評古人骨已腐

立身體忠恕不可有我障行文貴新警不可無我相古
人作先導厥初利祈嚮圍棋必有譜翦綵必有樣泊乎
規矩得剽竊非所尙擊刺出心兵組織窮意匠如彼鴻
蒙遊四顧絕倚傍揮斥八極閒宵作匍匐狀卻嫌著錄
者烟海無盡藏偶然樹一義謂自我意創及觀未見書
已是唾餘長陳言務去難昌黎豈我誑

青天與白日婦孺知光明瑤琴與寶瑟鬼神聽和平詩
如樊宗師文如宋子京好爲險澀體空谷鉤輞鳴文章
有大道馳驅範縱橫肯向荆棘叢詰曲細路爭六經不

難讀字字皆近情盤詰固贅牙當時詔黎毗如今官文
書或別有式程不然多舛脫口授由伏生莫闕昏闇室
莫學兜離聲誰攜謝朓詩青山高處行

登鎮海塔

絕頂盤旋上西興一望中高標臨斥塹元氣轉鴻濛山
有赭龕東潮兼江海通九關如可接直欲叩蒼穹

雙忠廟

許睢陽爲吾邑人城中建廟官爲致祭
并祀張中丞焉

不須抑遠獨揚巡同是當時致命人危到城中無鬼妾
死知河北有忠臣兩家子弟材俱下百代烝嘗節竝新
可惜廟前方丈地烏金未鑄賀蘭身

廟於明洪武間改建

崔府君廟

少康光武中興功宋代南遷事不同眞主飛龍天水碧
府君泥馬廟門紅山川殘剩甘般樂君父仇讐怯戰攻
那識三呼渡河意有人臨死奮孤忠

富春舟行

朝發漁浦潭夕指桐廬路舳艫曠搖颺川塗莽迴互嵐
光挹螺翠江色淨縞素晶晶激邊沙森森洲外樹霜花
散偃荻雪翻明飛鷺萬狀紛目前前瞻失後顧孤征氛
滓隔獨往賞心屢鼓枻濟通津冀有仙眞遇願言采蘭
茝芬馥遺親故

七里瀧放歌

昔聞桃花源秦人所避世漁者一出路復迷扁舟再往

空審諦後無問津人靈境千年閉何如七里瀧叩我舫
兮拓我窗上有蔚藍之長天下有見底之清江層崖疊
嶂夾岸出巘岈離立高臺雙富春已來迤邐好山水到
此不覺心魂降雲容容兮欲雨湍砢砢兮如雷乍烟蒙
而霧翳忽霏散而暝開丹黃蒼翠萬木紛雜粦碧蘿深
處三五藏荆柴漁郎收網捫葛上樵夫踏徑擔薪回中
有畫眉啼仙犬吠竹雞杜宇相呼相喚歡樂兼悲哀客
星兮寂寞朱鳥兮摧頽眇雲嶠兮不見望夫君兮歸來
空山欽崑崙截嶽而偃蹇兮高風亮節終古與之長徘徊
舉酒兮傾一卮擊節兮歌一曲抗手爲謝馬當神不用
長風張去聲帆腹迢迢便當七十里畫本吾猶看未足何

必七里來相促

諺云有風七里無風七十里

釣臺

銅馬不結屠沽羣南陽游學有故人一朝崛起作天子
孰不感激隨風雲子陵無心慕爵祿勉就安車畱信宿
獨臥我腹撫帝手共臥我足加帝腹二十八宿明班班
龍鱗豈患無人攀唐堯不奪許由志長揖拂衣歸故山
山中坐弄潺湲碧六月披裘一釣客魚之細兮比秋毫
綸之長兮垂百尺當時莽新漢臘摧符命功德書紛來
豈知運祚還赤伏矯矯風節偏崔嵬釣臺雲木空中俯
過客遲迴鳴去鷁漠然山高而水長想見清風照千古

辛巳正月初六日應禮部試北上

少小辭家上玉京欲隨仙侶聽春鶯
皇居壯麗心誠慕子舍睽違夢轉驚弱歲名成稀遠到古人親在只躬
耕重闈不識關河阻定逐征帆數去程

初發杭州贈同年雷雷峯

柳雷

西笑望長安出門從此始弱齡不識路緩急將誰恃陸
經齊趙郊水涉江淮汜修途仗友生鷄麀若相倚公車
方接軫攬結皆可喜投分或非人高堂念游子會當資
器識豈徒託行李與君貴久要斯言如白水

渡江望金山作歌示雷峯

吾聞大江之水由邛竦跨荆挾漢迷津涯天彭井絡幾
千里到此入海無停迴潤州城邊曉問渡銀濤如屋奔

騰來長空飛鳥去漠漠魚龍拜舞隨風雷環江屏障不
知數無人指點名空猜祇有浮玉著樓閣中央宛在離
羣儕是時燭龍初出海曦光照曜黃金臺雙眸眩轉無
定矚欲言其狀聊談諧譬如妝成新婦髻明珠步搖翡
翠釵從扈扈復縈縈翻令蒙羣紅顏佳浮圖插空豎
佛指似向遊客招芭屨攀躋有志卻未逮一翦徑度瓜
州隈京口由來用兵地古人廢興成劫灰紫髯遺蹟久
蕪沒寄奴英雄安在哉江山萬古長不改丹青大畫乾
坤裁十年下帷守環堵醢雞眼界今朝開安得從君直
造青城頂同酌岷源水一杯

雷峯
蜀人

揚州

揚州信佳麗淮南一巨府荒淫自阿廢流風漸斯土竹
西盛歌吹邗溝走商賈近代益繁華猗頓起鹽鹽銅山
與金穴只在牢盆煮既操大利權奢樂靡不舉甲第擬
王侯華堂狎歌舞頤能食客指眉必妖姬懶隋和百販
集星卜九流聚是皆逐臭夫志行不足數朝貴亦貶尊
眈眈覩阿堵冀沾學瀝潤不惜屋檐俯以茲辱鶴背彌
足驕馭豎九牛損一毛歎唾變寒暑豈知何遜閣老梅
本酸楚亦有歐公堂清芬灑蘭杜況乎忠義流大節炳
千古頹陽力揮挽傾厦猶欂柱其愚不可及其忠亦無
補前有李制置後有史閣部

淮陰弔古二首

王孫方寄食國士未知名運會逢蛇斷功勳召狗烹難
逃丞相手不負婦人情太息淮陰釣青苔石上生
少年中尉讐能釋老母千金享亦豐回首十三人盡死
不知何以報滕公

漂母祠

淮水湯湯拂柳絲韓侯遺蹟至今垂平生未報人恩處
不敢輕過漂母祠

秦安卽次

生小不識車行路仗篙櫂駕言齊魯道輪蹄非所習兩
驂竝兩服木箱架葦蓋隱見柳岸邊望若舟一葉豈知
車中人眩暈難安帖如鑪傍鼓鞴如米遭舂甬昨上秦

安山山徑多險陜，崎嶇無善步。欲陟魂先怯，轂摧石匄。
訇駢絳木匝，匝首尻互顛。倒筋骨亂開，闔觸頭頭出血。
擺指指脫甲，百物盡簸搖。毀器倒筐篋，有時或僨轅人。
馬兩俱壓人，從橫裏逸馬。欲空中踏歌，眠困捫底奮。迅
不得立扶車，始出馬長鳴。振尾鬣惜哉，好山色蒼翠萬。
屏疊無心耍，賞玩敢向神君揖。且投茅店宿，抖擻敝衣。
恰邨醪薄亦佳，微月西窗入。

趵突泉

琉璃亭子紅闌干，映帶遠岫霏蒼烟。三枝玉筍當戶立，
大珠小珠跳濺濺。初疑怒雷奮出地，欲逐神龍飛上天。
道旁野老向余指，云是古時趵突泉。天下水性皆橫流，

惟有江海驅駕生潮頭不然過潁在山由搏激出以人力亦可求異哉濟源水隱見走千里水銀瀉孔無不有佩刀一刺便泚泚自從渴馬厓伏流至於此靈機不受后土束亂發空中白羽矢誰移匡廬瀑布入黃泉歎飲倒向青天指我來歷下訪古風對此不覺心神融甘香清冽賞其味發揚蹈厲觀其容徘徊欲去不忍別似躡冰壺探月窟吾鄉亦有泉虎跑恨他不作來如突

濟南遊張氏漪園

我識南屏魚未飲濟源水竭來歷下遊風物何清美芳草有意綠垂楊絲半委泚泉隨地流嶽翠滿空倚言有張氏園近可馬鞭指呼朋載酒榼幽興不能止入門路

阻折位置分表裏洞房既窈窕修廊亦邈迤平臺最軒
豁矚目無遐邇青山遮不住黛色透城雉環廊遍池沼
清澈乃見底便當解冠纓一浣俗塵滓文鱗隊隊游尺
半紅之鯉投食勿遽吞似有貪饞恥吾曹媿弗如一笑
可以起

少年行

銀鞍白馬紫絲韁行過青樓大道旁似有美人頻指點
不知何處少年郎

禮闈報罷附雷峯南旋二首

貧賤何須恥羈孤亦足危百斤金未挾三尺劍空持驥
尾無雲路禽心有越枝一奴方畔去顧影益淒其

四海皆兄弟難君倜儻才天倫在異姓日下昔同來白
璧非無匱黃金亦有臺鳳皇銜我去病鶴羽初摧

劉智廟早發

暑路利早發驅車雞未啼仰天何所有北斗七星低

濟寧登舟

炎天照赤地豈是問途時懷歸苦不速遊子在天涯出
都閱旬餘車鳴作揉歎宵征隨熠燿早飯飽麤糲行行
近濟寧排岸帆檣停輕舸駕順水客意先與爭卸車日
將暮瀟灑脫巾屨鄉音在舵樓已有吳孃語

過天妃閣

擊楫渡黃河欣喜謂出坎旋臨天妃閣海至又入瀛水

如屋建瓴壘石自搖撼高低九仞懸曲折三重掩前船
一失手奔觸無收攬呼嗥救不得立見粉齋慘我舟起
戒心欲放試以漸倒行百纜挂齊力千夫喊蓄勢初陵
競迎機忽勇敢機張省括釋關隘奪門斬我方抱版扉
無計脫虎檻居然束矢搜安穩下瞿濫柳隄小淹泊驚
定已破膽酌酒相賀勞新月光閃閃平居此意存何事
不防檢頭上雷霆威腳下江湖險

下第南歸仍肄業敷文書院呈山長齊息園監
院陳敬齋兩先生并贈同學周西園

茂蔭 王綱之 世綱諸子

場翅燕京返新霜著

直略切

絮袍九霄難送上一第媿虛

叨炙枉牛心雋禪惟犢鼻豪驂駒猶戔角附鳳少奇毛
自返誠何術逢時貴有操揣摩羞簡練衿佩戒輕挑院
宇西湖近師資北斗高昔曾容負笈今匪善藏刀武庫
憑窺仗元亭又載醪工因居肆集泥以在釣陶顏鑄還
雕宰經模夏效騷求聲鶯出谷納誨鶴鳴臯道岸津梁
闢文壇壁壘牢升堂同執卷繼晷各焚膏但得精勤勗
奚嫌澹泊遭耦耕深澤澤眾樂屏嘈嘈貧豈原思病疲
憐甯越勞閑情問山水永好結瓜桃屈蠖聊循木神鷹
會解絛諸公皆美好未必老蓬蒿

二十初度

瑁璫長安費酒錢秋風纔返孝廉船空言賈誼登朝日

已過蘭成射策年學有階梯難到頂事無閱歷可輕肩
不妨且隱南山霧元豹文章本未全

鳳皇山懷古

鳳皇山上故宮荒秋草離離澹夕陽蝴蝶粉飄三徑冷
蝦蟇聲促六更忙偏安半壁基空造自壞長城敵正強
夜靜滿湖螢熠燿還如燈火望平章

壬午三月初八日

南巡召試

恩賞緞匹恭紀

廷試初經第一番尙方文幣拜雙純

音端本國策

賦成那有

陵雲氣波及偏叨 湛露恩自分才非紅藥侶敢期身

到紫薇垣 行宮攀出秀人羨已抵春風著體暄

入選一等

者例授中書舍人
二等則賞緞匹

雨泊半山宵霽二首

山如羣馬奔舟戛疾於馬水田白練飛石瀟丹砂瀉急
雷打篷窗人在巉巖下

空山斷屐響買酒不知路林閒星月出雨陣失指顧夜
半菰蒲翻隔船喚官渡

題陳研齋 大文 竹礪清吟圖

風篁如答響礪戶莓苔滑詩罷無人聲衣上落明月

哭同學李丹邱 承業 四十韻

龍驤不同駕禾稗不並鑿人生臭味合那惜肺腑託四

明李丹邱瑤臺一瘦鶴與余同筆硯玉石互攻錯沈潛
本天性精進我不若少作已老成諸藝況淹博下帷共
攻苦得暇亦尋樂武原雪初晴檐前噪乾鵲探梅西郭
門彈棋東井閣擘窠或作字龍虎勢蟠攫鏤石或摹印
畫魚致磊落少年多壯氣嗟余偏落魄飢寒沮顏色奔
走軟腰腳劇憐蜉蝣姿數遭虺蝮蠹偶緣左角闕遂致
故步卻避之飛空林王孫猶引繳賴君獨調護大義爭
誇誇揮手向河梁蒼茫分袂各形蹤雖判隔音問尙聯
絡臨風一發緘涕下流泉澗君家本秦川蘭錡光褒鄂
君本武世家尊甫廟廊器來秉海邦鐸才可百里試交章薦
一鶚丈夫當雄飛小子亦爵躍君將百粵去貽書悲離

索招邀雨上遊竟阻剡溪約皆由余性疎亦被浮名縛
豈期玉樹摧凶問足驚愕北平數已奇

君尊人先一協
月卒於官

律命尤薄造化本忌才鬼神太肆虐翻令白髮翁長途
領雙槩既經瘴鄉瘴復渡惡溪惡誰招萬里魂空奠九
泉酌夢到讀書堂殘燈猶照灼分明拍余肩呼余坐簾
幙案上紙筆新階前藹藹弱覺來月未沒淚溼睡難著
交情死後知敘述生前略萬事總酸辛百端增錯莫酬
君僅此詩搔首問寥廓

借諸叔野步

飄盡枝頭萬點花行來處處足桑麻不須料理尋常債
自脫春衣當酒家

送研齋謁選赴都二首

不患無名位從茲作宦遊才長宜少蓄詩好莫輕投驛
斷鄉音路蟬鳴客夢秋西湖歌吹裏已早伏離愁
聞說毛生橄欖顏博老親

君恩無小大臣職總艱辛肯爲微官累由來舊業貧故
人心似月夜夜送征輪

閏五月十五夜對月懷陳香園

蘭

薄暑銷清簟微風襲素襟那堪今夜月偏照別離心之
字不可見白雲何處深幾時修竹下相對理瑤琴

湖上觀荷步月歸寓

白鷺如高士紅蓮似美人湖光兼與攬風景十分新在

手杯難放當頭月可親醉歸松竹徑樹影滿衣巾

經廢寺

一寺依山隙門前對綠蕪池枯萍欲死牆古蔓難圖老
樹盤紅鶴荒烟走白狐殘僧三兩筒擇蝨結跏趺

雨中送客

一碧荻蘆洲鳴榔發櫂謳好山如送客疎雨欲迎秋覽
景增詩興聞歌動旅愁人生無別苦河水亦西流

題友人照

秋色澹如此挈舟出葦間雲烝菰米黑雨點蓼花殷高
興訪僧去有時騎鶴還優將詩筆放畫手倩荆關

南屏山舫偕大恆長老心舟上人茶話

山前絢金碧山後掩松竹舫齋跨厂出扼要無遺矚
嶺納羣翠全湖收半淥況對粲可流肌骨何由俗遊人
爭擾擾欲向湖中逐不如此地涼人間有三伏

西湖采蓮曲

采蓮兮采新荷新荷六月西湖多誰家女兒曳輕羅蕩
蘭橈兮橫素波紅顏皓腕髻戛戛花嬌人媚光相摩田
田之葉正復頗竝頭竝蒂藏花窩鴛鴦鸞逐隊過裏
湖外湖艇若梭好風飄來阿子歌浮萍一道開碾渦擢
入花心不見他

海嘯井引

縣城東門去海不百步七月十三日泊舟於此時

天方旱暵人情望雨二夏風雨大作凡一晝夜抵
暮雨未止而風色加厲海嘯之聲震撼山谷居民
遷避入城如鴉鵲爭窠聲嘈噴不可辨余蝸縮篷
窗衣被盡霑溼求蔬菜不可得煮白飯食之酒夏
無論已舟初泊繫纜桑本明日視之桑已沒其杪
舟子以蒿量橋門水漲一丈八尺又明日乃定

乾隆壬午秋七月祝子省親返家室維舟縣郭大東門
倒注銀河雨不歇自昏達旦歷昧晡瞥見城根隄岸沒
晚來海嘯更可畏砰砰咄咄定何物初疑六鼇翻身地
極頽又疑雷公失足天根摧石頭路滑萬鞞擊昆陽城
小千軍來鬪龍憤怒窟宅徙虎豹咆吼山崖開陽侯拜

天吳舞駭狀殊形不可數伍胥前文種後江濤助勢挾
奔走赭龕搖動三壘掀颶母來往揚旌旃風聲潮聲亦
不辨但覺萬竅噫氣鬱勃無由宣此時性命鴻毛輕居
民避灾盡入城我欲從之沒岸登一點漂泊波心萍五
夏餘怒猶未息隱隱天鼓空中鳴世閒何路平如砥去
家咫尺且遭此鬼神戲弄亦偶然卻念重闡憶遊子

乘輶船

井引

明日霽水與橋平所乘舟不得出乃易漁舟俗所
稱輶子船者一僕肩背相倚坐所過禾稻盡偃沒
入里門循屋檐而行到家繫纜廳事前楹乃得登
三喬鳥達摩履飛度天闡涉江水非仙非佛吾何爲一

隻輕鞵歸故里良苗已秀未結實一例波吞白瀾瀾眼
見萬頃失秋收天公豈不憐赤子道逢問津人摘埴尋
路路莫分僂思共載鞵小不可受告以高原可上周行
遵惻隱之念自然發勢窮言語徒殷勤吁嗟乎原疇無
田有苻藻市廛有屋無橋道行過樓窗閣柵邊處處窺
他室家好廿株榆樹雙鵲巢知是吾家門外高枝梢堂
前汨汨庭院徧池沼上階纔把鞵船拋老親相見開顏
悅細把杭州來路詰風波恐惹二人驚昨日程途不敢
說

夜坐

秋靜良宵永開窗坐小軒河橫天欲曙潮怒海疑翻露

氣草頭宿蟲聲牆下繁此時吟興發幽絕轉忘言

臨平晚飯放舟臯亭山下泊二首

沽酒臨平市場舫紫翠旁微微交遠樹渺渺度危梁斲

近魚鰕賤林深橘柚香山僧賣泉水先得一瓢嘗

向晚臯亭路移舟未覺賒果田花當穀

居民藝桃李爲業

戰壘

戟沈沙風色常防颺山容似散霞安流須穩睡深處有

龍蛇

臥霞山

聞有幽棲者高眠此避喧日篔千樹影水縮半湖痕黃
葉寺前路紅樓山外邨扁舟來往慣訪古與誰論

金又亭國子

以塘

自吳門來邀其遊湖

送客燕臺柳攀條憶去年黃河流袞袞青草路綿綿復
此西湖路重逢北雁天壺觴須盡醉莫負糜頭船

遠眺

木葉隨人走飄飄任所遭孤城當日落秋氣與天高山
腹荒吳殿江心折越濤青雲有征鳥仰面看飛翺

秋夜聞笛

長短誰家笛龍泓度遠吟異鄉今夜月遊子故園心似
恐愁人睡翻爲裂石音一腔豪宕意感激更難禁

孤桐吟

落葉入我牖孤桐風自吟枝柯吹不斷一任雪霜侵誰
言君子意不如草木心

悅親樓集

卷一

六

草蔓吟

池塘青青草春風吹滿道八月火燎原燒痕不可掃城
闌離離蔓火雲蒸不爛敢有枝節生長與荆榛絆草生
無復鋤蔓死亦難圖芟夷蘊崇之善者可以滋

偶得

秋氣無高下只在蒼厓間嶺雲生素色澹然如我問松
陰遇樵子相與叩柴闥盡醉東籬下日落不知還

登萬松山頂魁星閣展眺

屋後埋奇石門前列怪松地餘龍鳳蹟人盪水雲胸絕
頂陵飛閣危欄當倚筇展開千里目收拾萬山容湖面
天爲鏡江濤雪作峯城牆蟠屈曲野徑闢橫縱下嶺僧

初去穿林鳥忽逢，嘯空磨洞壑，送籟雜笙鏞，異產冰壺質，神工鐵筆鋒。山產天然印，章石似攀隱，隱有字可辨，其最奇者一石上有次風二字，乃山長齊息園先生別號也。大昕今日鼓長樂，昔時鐘南宋山先生曾爲文以記。包禁內，訪古懷猶壯，探幽興未慵，身高須穩立，腳底落霞重。

將入都留別敬齋先生二首

盤分苜蓿累先生，一飯兼金抵重輕，自爲王孫非望報，從來師弟亦論情，筆花五色開難足，楮葉三年刻乍成，今日受經堂下拜，相看能不淚河傾。

高齋下榻廁儒林，恩意綢繆屬望深，疾病有時親和藥，寒暄無事不關心，書紳敢忘冰淵戒，操縵難爲山水音，此去旅魂猶眷戀，浴奎池畔竹森森。

臨平道中寄懷孫補山舍人

知君身到鳳皇池
橐筆高吟謝朓詩
今日臨平山下路
梅花依舊發南枝

臨行

慈母執鍼線
檢點舊服御
臨行淺淺縫
歸期勿嫌遽
今日侍餐飯
明朝不知處
畱心慎眠食
努力蜚聲譽
一步一丁寧
恩深多遠慮
恐傷遊子懷
故學小兒語
有淚不敢揮
悵悵登舟去

臘八日偕蘇二方潭

燦北上

觸暑衝寒襍被輕
頻年奔走爲浮名
身微不敢煩郵吏
只有青山管送迎

無錫阻舟

好通而惡塞人情罔不然何況行道時捷足尤爭先今
朝惠山下鱸棹何蟬聯京口埧未啟一檻當門攔大舸
既停壓小牒亦流連銜尾三百里擠排無縫穿阮生在
哭路齊客難逃關轉如阿童軍萬竈屯炊烟卻喜九龍
峯空翠飛目前曷不攜團茶往酌第二泉眾舟裹一葉
進退同抵藩無由超畔岸只許遙看山伊誰趨避急改
陸尋筍筏吾曹幸無事酣歌且高眠埧開船自進鰲去
何憂咽所慮達彼岸黃河腹又堅

王家營度歲

昨日黃河打薄冰今宵旅館伴孤燈回思二十年來事

此夕離親卻未曾

富莊驛早發三首

驟齧槽上芻鼠齧窗閒紙天雞一聲鳴車行似流水
驅車各趨程自謂出門早有人捉馬通已伺店前道
邨婦賣漿餅孤燈隔箔紅江南羅幙裏正在黑甜中

悅親樓詩集卷一終

男志箕校字

悅親樓詩集卷二 起癸未五月盡甲申

海寧祝德麟止堂

古今體詩七十八首

五月初十日 乾清宮引 見蒙

恩選館恭紀

此身真箇到蓬壺一點 丹豪雨露濡縹帙夙期中祕

讀玉書先向上清摹庶吉士年輕者例習國書 敢援終賈誇英妙

且附夔龍學步趨器識文章何所取撫衷堪對去華無

贈王夢樓侍讀宋小巖編修

三吳萃秀彥結綬遭良時翔遊天闕下婉婉雙長離隋
珠不獨曜和璧非專奇持衡校春士各網珊瑚枝第頌

膺上選翰苑生光輝

五月間樓第一小巖亦高等

御試翰林夢

名齊價益

重分投意無違賤子媿弱翮往歲瞻光儀柯條今竝集

棲息況鄰比晨昏笑言接出入形影隨居當長相見去

時余有意乞假故云

偕沈雲椒編修阮唐山舍人遊陶然亭法源寺

孤亭踞岡阜延瞰城西垂宮雉遞隱見柳莢相因依駕
言共攀陟一振緇塵衣迴車入古刹先拂蒼苔碑緣徑
枯樅蔭連叢丹碧輝禪房蔚花木惜不逢春時二子擅
美藻腹中有清詩勝游自茲始願陪蠟屐攜

謝夢樓惠題拙稿二絕卽次元韻

童年詩句出天真漸恐豪端染俗塵稽首維摩求說法

翰迴難屈老坡身

豈有佳篇倒錦囊
題詩弊許意何長
如君不獨分膏馥
風義花中比拒霜

附
原作

王文治

心畫心聲自有真
風雲月露總前塵
東坡愛向杭州住
六百年來見後身

水容山態半奚囊
青鬢風塵道里長
令我悲涼十年事
故征衫未浣秋霜

得歸娶假畱別諸同年

黃姑居處太無聊
暫許承明館業拋
好合爲求琴瑟御
臨分猶戀鳳皇巢
休將隔面疑崔象
曾以看花笑孟郊

紫陌青門俱在眼夢中尋路不愁滄

詰旦將南發宿小巖棗花書屋夢樓以官事先

一日別去

來時同賞棗花香臨別依依尙對牀桑下我無三宿戀
海中君且一身藏明晨望闕頻回首何處離人不斷
腸可惜應官聽鼓客未於歧路話分張

出都二首

鄉關迢遞水郵賒一第難將畫錦誇預想到家調膳樂
二人頭上未霜華

蕭史吹簫引鳳皇有人先我下江鄉明年並轡還朝

日同上周南第一章

時同年秦芝軒編
修亦乞歸娶假

沽上晚步河隄得查氏廢園小憩二首

驛樹夕將暝水禽寒不飛我來停桂檝散步得苔磯一
徑自曲折野雲無是非入門隨意坐楓葉落征衣
繁華思在昔管領定何人亭角蘿牽幔牆根草綴茵虛
廊猶貯月深塢不藏春興廢尋常事臨流且問津

衛河卽事

似帶如腸詰曲盤逆流疑上富春灘堠排雙隻防隄易
路轉東西挂席難撥悶最嫌邨釀薄迎寒休怨客衣單
瀕行支得 天家俸已製狐裘一領完

古別離

商人好別離妾作商人婦結髮未久長江頭折楊柳楊

柳隔歲新愁殺陌上人坐歎容華歇桃花幾度春春去
春來憐不得巴陵兩載無消息昨聞江上有歸船停梭
獨立深波前歸帆渺渺在何處雲暗千重萬重樹不見
行雲望妾歸翻教妾夢隨雲去樹枝西風涼徘徊向空
房城頭忽起彎彎月月色分明照妾牀照牀明月無心
入桂宮催度銀蟾急挑燈重拆寄君書紙上啼痕紅淚
溼莫織迴文錦盤中讀不成莫繡鴛鴦譜分飛命亦輕
望君何處是思君不能止何日是佳期開顏展羅綺絡
緯啼蕙草空脈脈悵悵人意慵碧水芙蓉顏色好那經
秋雨又秋風

運河八百里有閘密於櫛築岸規垣墉開門仿戶闔浸
淫過三版袤廣僅十笏坳堂杯或膠藉以謀蓄洩自從
臨清來所至逢梗閼三里宿一宵五里停一日繫纜石
發笏如車脫之輓水手聚攤錢舫公坐擇益千艘須臾
集聲沸蜩蟬聒智勇兩俱困險隘誰能奪其下晶簾懸
其上銀濤凸卻如空山行溪泉聽汨汨閘吏自尊大隻
手管啟閉謂當慎職守那復容干謁篷窗兀然坐膏騰
凭雙膝夢遊馮夷宮水深不可越起視潺湲際翻碎玻
瓈月來朝放溜過一笑飛禽瞥

放閘戲作十韻

鳴鉦傳急響啟版聽喧阗兩戒轆轤轉中央局鏞開雨

飛花捲雪潮落勢轟雷白浪千檣下青天一鷗來亂疑
鴉陣黑頽訝玉山皚似出屏風疊如經灩澦堆倒看津
口樹背指候人臺老婦撈柴把羣兒拾蚌胎暫辭守株
苦漫說濟川才得過且須過臨流歌快哉

寂寞

舟居何寂寞把酒憶親朋水驛原知緩船窗盡日凭秋
高聞戍鼓烟暝見漁燈遙指黃河岸端憂十月冰

睡起

客思太無憀眷言衾枕美迴波與落葉拉雜聲到耳起
視黃鵠飛歸心白雲裏

彭口行

彭水徑嶧山瀾瀾流且清治水導水性源委詳桑經徙
之就徐沛不知誰所營坐令轉漕地膠澀連鄒滕干夫
事畚鍤兩岸堆岡陵是名爲堰淺主簿司其成指揮執
鞭扶左右供使令疏濬役告戴喜見波汎淳云當候驗
工要隘攔長綆大扁峩峩來船尾插羽旌船頭樹赤幟
播鼓聲鑿鑿主簿默屏息手版忙趨迎開繩放船過久
立猶陵兢其後一船至折簡走急倅啟請未及已簿怒
頸發頰一繩抵劔閣飛度誰人能東舸與西舫鱗次無
敢爭吏卒偏解事斂錢優其行大船輸十緡中船五千
贏小船無一錢飭令十日停船家不耕織以船爲死生
稽畱絕活計願官憐窮氓老翁叩頭乞老婦涕淚零天

高霜月白簿醉玻璃觥

祝風詞三章

有鳥拚飛六翻鞠之君子于役舟楫勞之千艫萬篙不
如破篷伸腰

二句舟人語

牽彼繩兮于河之干孤蓬無根上下波瀾冰雪嗟嗟河
之水不可過屏翳屏翳兮其柰何

飄風自南飄風自北操舟涉津繫唯神之德我則德女
人不直女

晚眺

歸牛下層坂自識原頭屋暝色曖遙邨人烟起寒綠

渡江

鐵鎖千尋斷金山一點浮行來瓜步口疑入化城遊殿
閣舟藏壑乾坤塹劃溝枕邊寒浪起猶帶六朝愁

京口晚泊寄夢樓

霜滿船篷月滿林夜分欹枕尙孤吟君家門外潮千尺
未抵相思一寸心

題泛查圖

清淺蓬瀛夙問津九閭還擬摘星辰借他僵臥平沙木
泛我虛浮浩劫身萬里雲開潮意氣三秋水長月精神
支機石尙天孫乞畱待垂簾賣卜人

蘇州道中懷小巖二首

有美溫如玉同心利斷金高文無下考青鬢稱華簪一

別恨何已相知誰與深
伯牙流水曲記得韻愔愔
夢裏分明見鄉邦復此過
長洲波淼淼燕市雪峩峩
名達文章少官閒歲月多
冰廳退直暇著述近如何

到家五首

水程迂且阻我行何悠悠
九月發京師十月下徐州
十一月終乃得達故邱
羣兒何自來看我維輕舟
叩門一婢出犬吠聲不休
驅犬婢奔告阿孃忙下樓
上堂啟大母阿耶扶白頭
拜跪未及起喜極翻淚流
撫兒頭與面拂兒衣與裘
諸事不遑問但問兒佳不

阿孃入廚下浙米聲叟叟
小婢市中返咄嗟羅膳羞
耶孃對案坐大母居上頭
呼兒來侍側魚肉紛然投
阿耶

開懷酌與孃互勸酬大母素不飲亦復傾三杯
叶酒中
問兒還水程何淹留九月發京師十月下徐州行人無
定蹤難覓寄書郵念兒經風霜耿耿心懷憂今朝喜見
兒已解飢腸紬所欠只新婦聽兒歌好逑

大母醉就寢阿耶亦滅燭隨孃上樓梯燈盞光煜煜孃
言五十三膝下唯兒獨兒毋輕視身是孃一塊肉少年
掇科第經史未滿腹早達眾忌招自卑遠到下半年居
日下新進冒寸祿交遊可慎擇行步可檢束言深雜悲
喜語碎及寒燠不覺雞三號伴孃腳下宿

明晨具禮服潔齊宗廟見

湖電反

遂造仲父房叔季起居

徧大姊理權回向弟申繼卷小妹牽衣戲指說朝衫袂

存問及四鄰次第逮親串鄰女滿牆頭欲窺先障面鄰
翁強解事呼兒教比看鄰媪排座來要說金鑾殿
應酬事巖畢大母坐高堂嬌憨學兒啼投懷索果嘗大
母笑且嗔往境兒思量自兒八九歲匣中貯餵餽放學
賜之食揖罷趨踉蹌兒今已爲官故態猶不忘烏鳥知
返哺此德何以償開箱檢宮錦兩頭束紙黃盤龍壓金
線陸離有文章長跪奉大母歸裝甚所將此乃御賜
物爲衣莫爲裳願母服無斃祝母壽無疆

湖州絕句

清遠吳興景最奇嵐光匝匝水漣漪溪山勝處人能畫
難畫將昏欲曉時

雨阻不得登道場山何山

吳興賢守我嶠仙勝遊往往尋溪山雨舟把燭寫風篴
嫋娜恰配雙雲鬟白蘋洲前弭桂楫朗吟佳句開心顏
斯人已往山不改那不攜屐窮躋攀紅亭白塔空在眼
一雨頓遣良緣慳風光自古無盡餉山靈或者憎疎頑
衝烟漠漠飛鳥去貼水澹澹眠鷗閑船頭隱約照山色
空濛仍帶林霏還孤燈旅泊掩書卷臥聽溪水流潺湲

長興道中三絕

迎暉雙槳打琉璃
罨畫溪邊泊櫂遲
跳上岸頭沾下若
滿湖菱芡十分宜

珍珠泉水出金沙
顧渚初烘粟粒芽
涓滴天公難借取

年年不誤貢春茶

圖經載金沙泉水貢茶後卽瀾

最好人家傍翠嵐
路通陽羨入江南
善卷洞在荆溪上
此去孤舟不厭探

寒食前一日雷峯偕胡慕泉

鼎山 高漁邨 拱宸

訪余葆光居畱連信宿遂同舟赴杭

門前楊柳綠含烟
屋外花光照水妍
公子愛尋芳草徑
故人同泛木蘭船
寒廚僻野無供給
高燭歌呼少睡眠
畱客客翻牽主去
西湖正值豔陽天

淨慈寺坐大恆長老精舍

瀕湖多古剎出郭此最近
枕抱南山陽開豁無遁隱
寺門面雷峯僧房背雲巘
石椽殿角壓松籟屏風引
隨宜

暫游行淨地唾每忍遂造方丈室欲叩諸乘相道人紫
袈裟詩筆類無本蕭蕭慈竹林愛客手刷筍伊蒲既飽
饌已覺安心盡

子忍切

層樓一杵鐘斜日照欄楯

雨後同雷峯漁邨遊理安遲方潭不至五首

雨餘霽色明春風吹面善出城草木香尋徑峯巒轉泥
存虎跡風莎襯馬蹄輒斜矚日光篔簹仰睇雲態變遙林
既蒙密近嶺亦婉變溪九澗十八絡繹鳴泉演得朋未
覺孤探勝那辭遠惟聞子規聲一路啼不斷

下馬暫息疲寺門聊佇立竹光碧雲洗濃翠滴衣恰陽
嶺度旭遲陰厓飛雨急瞥見采茶孃穿林三五十雙足
白於脂紅裙青箬笠腰懸篋篋中貯旗槍葉避雨如

麝奔未暇通問答轉入綠蘿去何處尋笑靨

他寺爛金碧此寺好在樸他僧工詔媼此僧佳在慙導
余入三門步步離垢濁先訪靈泉源俯井聽潺湲次升
散齋堂飯熟鼻觀覺修廊循曲磴一閣倚石角中有老
比丘偏袒拂子捉稽首問雲公無生會可學

山後望山前參錯來路迷後山何所有石壁爲屏帷古
木紛倒挂其上棲羣雞奚須自斷尾永謝宰割犧大可
十筋重兩足皆駢枝爪距層累生如布鐵蒺藜聽經伴
修行似木安能啼願師置蓮漏山深月易低

蘇耽鶴不來子晉駕將返樽腸悅禪味香積趁一飯輿
臺平等給肥脰足筍菌送客不過溪莫怪老僧嬾浩歌

撫長松六欲得所遣歸鞭指城郭迢遞下層坂吾曹縛
塵鞅庶幾歷幽踐詰朝詹宇閒猶覺山淥泫

靈隱寺

名山住俗僧祇益林泉辱不如寺外亭坐聽漱寒玉華
滋潤草樹哀響奏琴筑冷然清我心徙倚膚欲粟言尋
飛來峯苾屨踏浮綠千佛刻石厓苔身半剝瘵洞深晴
晝晦矯首怕抵觸天光漏絕頂靈液滲空腹不遇雙猿
公但見白蝙蝠香臺隔藤蘿且上三天竺

韜光寺

一條莓苔路萬箇篔簹影接筓引泉源開門當屋頂江
光納虛白池水養清靜口吟居士詩眼拓上方景山僧

采藥去雲溼鶴骨冷惟見桂樹邊袈裟挂一領

龍井

出山不見山山抱雲容住入山不見雲雲斷山光露山
腰欲上不上人雲頂將分未分樹柴扉隱見隔林樾策
杖坡陀尋細路當門怪石何峻嶒愈入愈有縱復橫搜
筋剔髓出奇骨狀如說卦不可名靈泉遇甃輒發見感
沸時有琤琮聲上方龍湫夏瑩潔百尺渟洞淨冰雪敗
葉飄墮鳥急救不許微塵浣神物倘然歎睡落金沙霹
靂頓防山骨裂當年卓錫參寥子髯守談禪常過此往
來二老亦風流地猶隱僻無人指卽今疏鑿御宿供
瑤樓閣道陵虛空山川顯晦有運會不招而至紛遊蹤

歸鞍攜將新焙茶穀雨初貢旗槍背惜哉城中水濁滓
明日飛符來調水

陪觀察雷快亭先生登女教場

在鳳皇山絕頂
宋時山入大內

御女音近當由傳聞而

謠今作詩姑據近志

左姬左右姬右三令五申一笑走孫武軍法太不情血
刀竟取妖嬈首宋家肄武學吳宮隊嬪嬙衣著戎體
弱不勝金鎖甲腕柔聊拓柘枝弓三千宮女聽號令兩
甄步伐何丰容長蛾暈豎柳葉翠細馬汗蹴桃花紅婦
人豈克揚兵氣大王似欲披雌風君不見和尚原大儀
鎮中興第一勳勞駿朱仙況有背鬼軍直擣黃龍士氣
奮金牌十二促召回玉帳諸團齊罷頓抱瓶女旣殉父

死擊鼓人亦隨夫遯對敵應貽巾幗羞衝堅豈賴胭脂
陣是時君王方宴娛和議已約歲幣輸臥薪本無句踐
志移官兼有唐宗虞紅妝偶爾博游戲皇輿早自安偏
隅阜陵雖具恢復略宿將垂盡功難圖師貞在筮丈人
吉軍動不勞娘子呼先生訪古披雲入寶御相從騎蹀
躞莫歎紅羊小劫過試看白雁秋風急

登吳山大觀臺

言經有美路

有美堂故址在山頂

獨上大觀臺吳越連裾抱江湖

夾鏡開孤城平楚斷飛鳥暮雲回第一峯頭立慙非作

賦才

鶯脰湖

一水通平望湖名絕可憐荻洲遙浸月蒨唱渺舍烟白
小如泥賤黃麗何處眠美人環佩冷愁思正茫然

虎邱寺

虎已秦時去僧從宋代傳寺藏山湧石池劈劍埋蓮樹
底吟詩鬼門前泊妓船笙歌擾擾處那識梵王天

航海

我行歷四瀆惜未蹈滄海買舟婁河口一角試渤澥潮
平帆飽腹入坎不能悔回頭岸樹滅但見白皦皦旋聞
雷霆殷上聲更覺鞀鼓賊驚濤濺入艙氣力勇逾倍每當
篷腳轉疑有覆釜殆風吹魚龍腥日發光怪彩戰兢人
語歇浩蕩天容改扣舷懷謝公雅尚竟何在

夢樓出守臨安假道蘇杭邂逅閭門舟次余以
事先別約於杭州相見也

白玉堂中物望華碧鷄關外宦程賒別離已抱三秋感
邂逅偏增歧路嗟此去湖山聊小住從今惆悵更無涯
酒鎗茶竈安排罷準待君來賞蕩花

陪夢樓策馬徧遊湖上請勝入城置酒丁仙閣
餞別

山蟬樹樹鳴揚鞭指湖寺徑折隨鐘魚水窮斲荷芰入
山漸覺深馬頭繞松吹旣酌龍井泉復挹鷺峯翠清暉
解餉客過眼如奔驥詩人領其要不必逐物泥乘隲理
歸策紫陽閣小憩丁仙鶴不來米顛石空祕玲瓏賞未

終芳醴已安置今宵一尊酒明日共誰醉

江口送夢樓

相看無語各魂銷此地真成萬里橋忽見孤帆雲外沒
有情能不恨江潮

西湖雜詠六首

書生著手便崢嶸水利興時景亦成今日雙隄花柳下
擔夫亦識白蘇名

花開陌上趁新晴緩緩歸來繡鞞輕那不愛憐兒女子
英雄從古是多情

江山明秀啟行都浙臉人來此宴娛五國城中無限淚
可憐飄不到西湖

韓園葛嶺逐番新太息羣姦秉國均一椽林泉幽絕處
當年曾有跨驢人

同心松柏結綢繆蘇小猶存教妓樓不葬岳子雙毅骨
西湖也覺太溫柔

暗香浮動影橫斜曾訪孤山處士家果是林逋眞眷屬
轉應失節笑梅花

湖上觀荷三絕句

芙蕖侵曉倍芬芳露未晞時水正涼顧影自憐明鏡裏
東方紅日照新妝

此花不比別花妍花固芳馨葉並鮮一陣狂風翻背白
鷺鷥窺酒亦擎拳

一隻蜻蛉泊柳陰枝頭時有亂蟬吟莫貪麩院追涼境
權入裏湖花更深

臯亭山懷古

丁家洲已師相走獨松關亦無人守江南再下一曹彬
欲取孱王及母后敵軍進駐臯亭山不煩一戰修降牋
得之孤寡失孤寡天道好還理固然守臣納款宰臣道
偷活草間半卿尹文山裂背血霑襟口舌無功胸臆憤
豈有熏鑪熾冷灰揮戈猶冀頽陽回一成未卜夏王起
九死翻爲秦帥纍成仁取義心原壯柴市魂歸天闕上
南海同悲陸秀夫北朝終重文丞相當時兩淮果合師
神州興復未可知六庚申祚帝所命忽有蜚語搖庭芝

卽今水木何明瑟考古惟留青史筆德壽宮中少斷香
臨平湖畔多秋月

自臨平達半山橋數十里閒翠屏延屬水泉甘
美春時萬樹著花爛若錦繡真仙境也吾邑上
杭所必經之路頻年來往於此今將別去舟中

聊賦一篇

如屏如几如卓筆一峯未了一峯突有時窈窕含春容
有時戍削露秋骨人家翠竹隱巖龕僧寺紅牆表嶺岳
帆檣影從樹裏度鷄犬聲自雲閒出上有靈泉隨處伏
接窺通流走曲折匏尊酌昏不論錢洗濯詩腸現冰雪
四時好景足攜取一到春來萬花發梅杏李桃次第敷

花田花港花風月蝶蜂盡醉那能狂襟袖皆香何待拂
山陰道上略比似武陵源口差髣髴人生處福不知福
每想金堂與玉室豈知仙境不外求眼前卽是真靈窟
吸光飲淥近十霜舉酒船窗今日別先買蓑衣贈釣翁
他年相伴茅菴結

滸墅關送雷峯隨任楚北

萬古長洲水朝朝送客舟偏令我與汝清淚共波流碧
樹漢陽渡青山黃鶴樓遙知過庭暇登陟總含愁

假期將滿就昏江陰使署奉母北上臨發紀事

二首

老母辭姑日衰翁別子辰將畱難展假欲去柰離親遠

道三千里高年二四旬

大母年政八十

合并無善策況乃是家

貧

堂前絲竹沸堂上哭聲隨儲養需甘旨承歡鮮弟昆未
教新婦見湖雷反翻促贅人婚族黨偏相慰齊稱喜滿門

妻兄李月槎

舟

之官楚中貳尹同發江陰贈別

君山青似眼

江陰亦有君山

送客到君山發軔自茲始分途較

我艱洞庭木正脫瓜步柳難攀卻看劉家妹盈盈兩淚

滑

淮安

鼓柁聽湯湯淮流入海長釜深隄壓屋柴賤葦編牆乍
見霜飛白空籌水敵黃此中多壯士試問少年場

過淮同年程漈亭

沈

招飲柳依園

一名荻莊

畱連竟

日卽席奉贈十韻

四圍楊柳綠卽以柳爲垣地小無多屋林深別有邨友
招仙鶴逸丈拜假山尊樹缺過帆影階欹補蘚痕相於
惟水石所適是琴尊夫子金閨彥斯文大將門光招忝
同譜勝集况名園子弟蘭兼玉登臨曉及昏櫂舟緣岸
轉穿荻見花翻萍迹難畱滯期君早北轅

時君亦以庶常假歸

桃源晚眺三首

乘曛覓晚渡樵販爭來集人散舟自橫寒鴉幾箇立
縉夫落絳罷鋪席岸閒飯艸公沽酒歸一犬隨之返
羣雞棲牆頭小兒縛雞賣雞更賤於魚滿船當蔬菜

臺莊阻淺改陸

陸捷費較繁水逸路較長惡勞惜資斧人情之大常況
當攜室家利涉謀舟航河伯慳一掬如食搯其吭膠澀
不得進節令催冰霜傾橐傲車馬改途重束裝新婦下
帷坐體態何矜莊老母不習車卽道翻彷徨暝眩轉去聲
頭目歐毆摧肝腸發軔已如此綿綿方未央古人宰一
邑安輿好扶將貧官苦草草不如墨綬郎我歌行路難
傍轂空奔忙安得雙鵠來乘汝空中翔

過趙北口

四年四度駐征驂隄上紅橋舊十三遊子攜家過趙北
史臣從事滯周南冰光黯澹綠蘋合烟意參差衰柳含

漸喜蓬萊佳氣近，整冠計日插朝簪。

到京初寓楊樹衙衛

家具空諸有，書箱未忍拋。雙棲謀燕壘，獨樹得鳩巢。

有庭

大槐樹
一株

計月輪租賦，隨宜設溷庖。莫言清宦味，纔是旅

初爻。

悅親樓詩集卷二終

男志裘校字